

Aenvih Sawcuengh gou roxnaj le Gvanh Swgingh yizsinj, caemh aenvih Sawcuengh gou bae baiq de guh lauxsae, riengz de hag Sawcuengh.

Gvanh Swgingh dwg Cunghgoz Minzczuz Yijvwnz Fanhyizgiz ngeih-gaep yizsinj, giem guh dayoz gyaousou, caemhcaiq de hix dwg boux conghyah fanhoiz Cuengh Gun song cungj saw, youq daengx Guengjsae cungj miz-mingz. Geijcib bi daeuj, de biensij, fanhoiz le haujlai bonj saw gvendaengz gij vwnzva Bouxcuengh, ndaej daengz vunzlai haenh ndei. Gou gig boiqfug de, gig gingqgyaez de, hix gig siengj coh de gouzhag!

Bi'gvaq, gou youq Namzningz camgya aen beizyinbanh gvendaengz Sawcuengh ndeu. Gvanh Swgingh gyaousou hawj dou hwnjdangz, gangj gij vwndiz gvendaengz coihgaij 《Fueng-anq Sawcuengh》. De rox haujlai doxgaij, gig miz ginghyen, gangj ndaej sengdoengh raeuh, gou dingq ndaej gig mizyinx.

Roengzdangz le, gou couh bae caeuq de ganggoj. De gangj vah hozunq, caencingz doiq gou. Aenvih Sawcuengh gou couh ndaej roxnaj Gvanh lauxsae lo. Gou daj bi 2015 haidaeuz hag Sawcuengh, hoeng swheij gag hag, mbouj miz vunz son, roxnyinh haemq hojnanz, miz haujlai vwndiz fouzfap gaijgez, gaenq miz di



doeknaiq lo. Mwhhaenx ndawsim gou gag naemj, doeklaeng roxnaj le Gvanh lauxsae, baenzbaenz aeu ra gihvei bae cunz de, cingj de vih gou gejdap gij vwndiz gvendaengz Sawcuengh!

Gihvei cungjsuenq deng gou ra ndaej lo. Bineix ndwen 11 ngoenz 11 banhaemh, gou dwk denva hawj Gvanh lauxsae, dajsuenq bae Namzningz cunz de, cam de gij vwndiz gvendaengz Sawcuengh. De baez dingq couh sangjswt dapwngq, angq-coux gou ngoenzcog couh daeuj ra de. Siengj mbouj daengz de boux conghyah

mizmingz ndeu baenzneix hozunq doiq vunz, naeksim bang vunz. Gou angq dwk baenz hwnz ninz mbouj ndaek, itcig cengq da daengz ranzrongh.

Ngoenz daihngaih banhaet, gou couh ganj daengz Namzningz lo. Youq aen bangunghsiz Gvanh lauxsae, de nyinhcaen son gou gij cisiz Sawcuengh. De sien son gou doeg gij singmeh caeuq yinhmeh Sawcuengh, naihsim niujcingq gij doegyaem mbouj cinj gou.

De doiq gou gangj, hag Sawcuengh mbouj nanz, cijaeu miz

saenqsim. Codaeuz hag Sawcuengh, aeu lai doeg, moix ngoenz aeu doeg Sawcuengh 20 faencung doxhwnj. Aeu nyinhcaen doiqbeij gij singmeh, yinhmeh caeuq singdih gvendaengz Vahcuengh byauhcuinjyinh caeuq Vahcuengh bonjdieg, haeujsim faen-sik, faencing gij doxdoengz caeuq gij mbouj doxdoengz, ra ok gij gvilwd doiqwnq. Baenzneix couh cugboub sug Sawcuengh, menhmenh hag ndei de. De lij daengq naeuz, hag rox Sawcuengh le, aeu lai yungh Sawcuengh sij faenzcieng. Daj faenzcieng dinj hainduj, genhciz sij mbouj dingz, baez bien baez bien rom, cungj miz ngoenz ndeu ndaej bienqbaenz boux sij faenzcieng Sawcuengh lauxhangz ndeu……

Ngoenzhaenx, gou soundaej gig lai, baenz ciuh mizik, mboujdan dwg rox baenzlawz hag Sawcuengh, lij rox baenzlawz doiq vunz, baenzlawz bae guh gij saeh caeuq hag bonjlingx.

Youq gwnz loh maranz, gou siengj: Ciuhneix ndaej baiq Gvanh Swgingh yizsinj guh lauxsae, caeuq de hag Sawcuengh, caen dwg cungj fuk-faenh ndeu, hix dwg cungj vuenyungz ndeu! Baezlaeng gou itdingh aeu hag ndei Sawcuengh, doeklaeng vih swncienj gij vwnzva Bouxcuengh bae buek guh, yienghneix cij doiq ndaej hwnj gij sim'eiq Gvanh lauxsae bw!



Gaxgonq miz song boux lwgnyez seng youq ngoenz he, boux he dwg lwg caizcawj, boux he dwg lwg bouxhoj. Mehyah caizcawj yienznaeuz bizlulu, hoeng mbouj miz cij hawj lwg gwn, caizcawj cijndeij umj lwg bae ranz bouxhoj, hawj yah bouxhoj cij lwg de.

Lwg caizcawj ndaej 6 bi seiz, caizcawj cingj boux lauxsae he daengz ranz daeuj son de. Hoeng, de cungj mbouj miz sim bae hag, ngoenzngoenz buet bae ranz bouxhoj caeuq lwg bouxhoj guhcaemz. Doeklaeng caizcawj cijndeij hawj lwg bouxhoj hix daeuj ranz caeuq lauxsae hag. Baenzneix lwg caizcawj cij nyienh naengh youq daizsaw. Hoeng, lwg caizcawj baengh ranz de miz ngaenz, cungj epbik lwg bouxhoj bang de sij cozyez.

Ndae 20 bi seiz, song boux lwgnyez majhung baenz bouxcoz lo, caizcawj aeu ngaenz cawx aen guenvih yenling ndeu hawj lwg de bae guh, lwg de angq saedcaih. Hoeng, lwg de yienznaeuz doegsaw cibgeij bi, cozyez cungj dwg ep lwg bouxhoj bang de guh ndwi, de maz cungj hag mbouj ndaej daengz fwngz. Ranz de miz ngaenz, ndigah de couh cingj lwg bouxhoj guh

saeyez.

Lwg caizcawj hwnjnyaemh, aeu hwnjdaiz gangjvah. Baenzlawz guh ne? De siengj ok aen banhfap, hawj saeyez sij gij gauj gangjvah okdaej. Hoeng, saeyez sij ndei hawj de yawj, de yawj mbouj rox, saeyez siengj gawq he coenz ndeu son de doeg, hix ganj mbouj gib lo. Vanzlij ukgyaeuj de baenq ndaej vaiq, youh siengj ok aen banhfap daeuj.

Ngoenzde, yenling daenj ndei buhguen, daiq ndei mauh guen, naengh cingq youq gwnz daiz, doiqnaj de cuengq miz gij gauj gangjvah ndeu, laj daiz caemrwgrwg, mbouj miz vunz gamj gangj coenz vah ndeu. Seizneix, yenling cingq caj saeyez youq manh baihlaeng naeuz hawj de baenzlawz gangj, de mbouj gamj faensim saekdi, gig haeujsim dingq. Yenlaiz yenling caeuq saeyez gaenq doxyaeng ndei, saeyez aeu sing iq gangj coenz he, de couh sing sang dwk gangj okdaej.

Saeyez gek gij manh yawjraen yenling dawz gij gauj gangjvah hwnjdaej yawj, couh gaenjgip sing iq dwk gangj: “Ngoenzneix gou hwnjnyaemh……” Yenling couh sing hung dwk cungz gangj: “Ngoenzneix gou



*Bya hung doxlienx fwjhau fan.*

*Liengz Sinhvaez ingj*

hwnjnyaemh……” Byawz rox saeyez nyaenx mbouj ndaej fwt ok aen roet raez, yiengj “bu” sing hung ndeu. Yenling roxnyinh gij gauj couhdwg yienghneix, de hix ok sing hung “bu” ndeu daeuj.

Saeyez muengz coihcingq naeuz: “Lauxyez, lauxyez, gou haxbaenh mbouj dwg gangj vah dwg ok roet.” Hoeng, byawx rox yenling hix sing hung dwk cungz gangj: “Lauxyez, lauxyez, gou haxbaenh mbouj dwg gangj vah dwg ok roet.” Saeyez baez dingq ging ndaej ndang ok hanh nit daeuj lo, de doeknaiq gangj coenz vah “dai lo”, yenling hix sing hung dwk cungz gangj “dai lo” coenz vah neix. Laj daiz cauz hwnjdaej lo, hoeng, bouxboux cungj lau yenling moq, mbouj gamj hemq sang, gymqgywt dingq ndaej nyi coenz vah “dai lo”.

Saeyez youq manh baihlaeng

roxnyinh muenghduenh lo, miz heiq mbouj miz rengz dwk gangj: “Sojmiz cungj liux lo!” Saeyez gangj sat coenz vah neix couh ngunh gvaqbae lo. Yenling cim gij gauj ndaw fwngz de hix sing hung dwk cungz gangj: “Sojmiz cungj liux lo!” De gangj sat lij dinghdingh dwk gaem gij gauj gangjvah, louzsim dingq saeyez youq manh baihlaeng gangj maz. Hoeng, nanznene cungj mbouj ndaej nyi maz, de hix mbouj rox baenzlawz guh lo. Laj daiz cauz ndaej engq haenq lo.

Doeklaeng hix mbouj rox yenling gangj maz lo, gyoengqvunz laj daiz cungj gag sanq dauqbae lo. Miz vunz cienj gij vah yenling ngoenzneix gangj okbae caez, saeyez singj gvaqdaej rox le lau yenling ienq de, couh lienzhaemh buetdeuz lo. Yenling rox swheij caiq cang mbouj roengzbae lo, hix buetdeuz lo.